

Dogri News Bulletin

22 October 2024 18:15 Hrs

Headlines

- राष्ट्रपति द्रौपदी मुर्मू होंरें अज्ज नमीं दिल्ली च 5में राष्ट्रीय जल सम्मान प्रदान कीते।
- सेनाध्यक्ष जनरल उपेंद्र द्विवेदी होंरें आखेआ ऐ जे भारत ते चीन बश्कार अस्सल कब्जा रेखा पर फौजां पिच्छे हटाने लेई दौनें मुखें बश्कार बसाह-भरोसे दा होना अत्त लाजमी ऐ।
- उपमुख्यमंत्री सुरेंद्र कुमार सिंह चौधरी होंरें आखेआ ऐ जे सरकार नौजवानें लेई अपने आमदनबक्श रोजगार खडेरने गितै बचनें बढी दी ऐ।
- प्रधानमंत्री नरेंद्र मोदी होंरें 16में ब्रिक्स शिखर सम्मेलन दे बाहरें रूसी राष्ट्रपति हुंदे नै लाई गेदी इक मीटिंग च आखेआ जे रूस-यूक्रेन तनाजा शांतिपूर्ण तरीके नै हल कीता जाना चाहिदा।

<><><><><><>

Prez. Award

राष्ट्रपति द्रौपदी मुर्मू होंरें अज्ज नमीं दिल्ली च 5में राष्ट्रीय जल पुरस्कार 2023, प्रदान कीते। एह पुरस्का 9 श्रेणिं च कुल 28 विजेतां गी दिते गए। इंदे च सब्बनें शा बेहतरीन राज्य, बेहतरीन जिला, बेहतरीन गां-पंचैत, बेहतरीन शैहरी मकामी निकाए, बेहतरीन जल उपयोगकर्ता संघ ते बेहतरीन नागरिक समुदाय शामिल ना। इस मौके पर राष्ट्रपति होंरें आखेआ जे सरकार नै जल जीवन मिशन दे तैहत देश दे 78 प्रतिशत कोला मते ग्रामीण घरे तगर नलके राएं पानी पुजाया ऐ। राष्ट्रपति होंरें आखेआ जे जल जीवन दी जिसलै 2019 च शुरूआत होई ही तां शडे 17 प्रतिशत ग्रामीण घरे च नलके राएं पानी पुज्जदा हा ते इस मिशन दे शुरू होने कबै ग्रामीण इलाके च रौहने आहले लोकें दे घरे तगर साफ पीने आहला पानी पुज्जने कबै उंदे जीवन स्तरै च बी बड़ा मता सुधार होआ

ऐ। राश्ट्रपति होरें जिमी हेठ पानी दा स्तर घटने पर चिंता प्रगट कीती। स्टाडे संवाददाता नै जानकारी दिती ऐ जे बेहतरीन राज्य दा पुरस्कार ओडिशा गी थहोआ जिसले जे उत्तर प्रदेश दुए ते गुजरात ते पुदुचेरी सांझे तौरा पर त्रीए नम्बरै पर रेह। इनें पुरस्कारें च हर जेत्तू गी विशेश श्रेणिएं च प्रशस्ति पत्र, ट्रॉफी ते नकद ईनाम बी दित्ता जंदा ऐ।

<><><><><><>

Army-Chief India China

चीन कन्ने लगदी अस्सल कब्जा रेखा बारै सेना प्रमुख जनरल उपेंद्र द्विवेदी होरें जोर देइए आखेआ ऐ जे दौनें मुखें आसेआ अस्सल कब्जा रेखा परा अपनियां फौजां पिच्छे हटाने दी सैहमति पर अमल करने लेई भारत ते चीन दौनें गी इक दुए पर बसाह-भरोसा बधाने दी बड़ी मती लोड़ ऐ। अज्ज नमीं दिल्ली च इक समारोह दौरान जनरल द्विवेदी होरें आखेआ जे चीन ते भारतीय फौज बश्कार हाल च होई दी फौजां पिच्छे हटाने बारै सैहमति दा मकसद अप्रैल 2020 कोला पैहले आहली स्थिति गी बहाल करना ऐ। उनें आखेआ जे दौनें पाससे दिएं फौजें गी इक दुए पर पूरा बसाह भरोसा होना लोड़चदा ते एहदी दौनें गी इक-दुए गी यकीन दहानी करनी होग।

<><><><><><>

Jaishankar-Agreement

विदेश मंत्री डॉ. एस जयशंकर होरें भारत ते चीन बश्कार अस्सल कब्जा रेखा दे इलाके च दौनें मुखें दिएं फौजें आसेआ गश्त गी लेइए बनी दी सैहमति दी सराहना कीती ऐ। उनें आखेआ जे दौनें मुखें परतिए उस स्थिति गी बहाल करने पर सैहमति बनाई लैती ऐ जेहड़ी 2020 च ही। डॉ. जयशंकर होरें आखेआ जे चीन कन्ने फौजां वापस हटाने दी प्रक्रिया मुकम्मल होई चुकी दी ऐ। उनें आखेआ जे नमें समझौते मुजब दौनें मुखें दियां फौजां इस इलाके च ठीक उससै चाल्ली गश्त करी सकडन जियां ओहू 2020 च करदे हे। विदेश मंत्री होरें आखेआ जे एह सकारात्मक उपलब्धि बड़ी गै सब्र ते समझदारी आहली ते कूटनीति दा नतीजा ऐ।

<><><><><><>

Army-Drone

पुंछ जिले च नियंत्रण रेखा कन्नै लगदे इलाकें च भारती फौज नै उत्थे डोआरी भरा दे इक पाकिस्तानी ड्रोन पर किश रौंद गोलियां चलाइयां। अधिकारिएं आस्सेआ दिक्ती गेदी जानकारी मुजब इक ड्रोन नियंत्रण कन्नै लगदे इलाके च उड्डा'रदा दिक्खेआ गेआ ते कुसै खतरे गी खत्म करने लेई उत्थे तैनात सैनिकें एहदे पर फायरिंग कीती जेहदे बाद एह ड्रोन नजरें शा ओझल होई गेआ, जेहदे बाद इलाके च तुपाई अभियान चलाया गेआ तां जे ड्रोन जेकर खल्ल डिग्गी पेदा ओऐ ते ओहदा पता लाय जा, जां फही जेकर इन्ने कोई थेआर वगैरा इलाके च सुट्टे दा ऐ-ओहदा बी पता लाया जाई सकै।

<><><><><><>

LG-Election

उपराज्यपाल मनोज सिन्हा होरें आखेआ ऐ कि जेहडी सरकार आम लोकें दिएं आसें-तांगें गी पूरा करने लेई बनकदियां गैंई पुट्टदी ऐ, उसी एल.जी प्रशासन दी तरफा पूरा-पूरा सहयोग ते समर्थन थ्होग। सिन्हा होरें आखेआ जे केंद्र शासत प्रदेश च मकामी निकाएं दे चुनां, पिछड़ा वर्ग आयोग आस्सेआ ओबीसी सीटें बारै रपोर्ट जमा कराए जाने दे तुरत मगरा कराई दित्ते जाडन। एहदे कन्नो-कन्नो उनेंमौसमी हालात साजगार होने ते लोड़चदी सुरक्षा बंदोबस्त उपलब्ध होने दा चुनाएं लेई होना जरूरी दस्सेआ। समाचार एजेंसिएं गी दित्ते गेदे इक इंटरव्यू च एल.जी होरें आखेआ जे सरकार लोकें दे हितै च जेहडे बी फैसले लैग, एल.जी दफ्तर उनेंगी हर मुमकिन सहयोग ते समर्थन देने लेई तैयार ऐ।

<><><><><><>

LG-Terrorist

जम्मू-कश्मीर दे उपराज्यपाल मनोज सिन्हा होरें आखेआ ऐ जे दऊं विदेशी आतंकवादी जेहडे लगदा ऐ जे उत्तरी कश्मीर दे बांडीपोरा इलाके थमां घुसपैठ करिए आए होडन, दऊं रोज पैहले गांदरबल जिले च होई दी आतंकी वारदात च शामिल हे जेहदे च इक्क डाक्टर ते 6 मजूर मारे गे हे। इनें बेपंछानू आतंकवादिएं ऐतवारें गांदरबल च श्रीनगर ते राश्ट्रीय जरनैली शिडकै पर बनाई जा'रदी इक सुरंग आहली थाह थाह पर इस प्रोजेक्ट च कम्म करने आहलें पर हमला कीता हा। इस हमले च 7 जनें मारे गे हे ते 4 घायल होई गए हे। मनोज सिन्हा होरें आखेआ जे इस वैशियना वारदात गी अंजाम देने आहले आतंकवादिएं दी तपाश जारी ऐ ते मेद ऐ जे उनेंगी तौलें उंदे अंजाम तगर पुजाई दित्ता जाग।

<><><><><><>

Didi-ki Rasoi

उधमपुर दिएं जिला विकास कमिशनर सलोनी राय होरें अपने दफ्तर परिसर च “दीदी की रसोई” नां कन्ने इक नमीं कंटीन दा उद्घाटन कीता। इस कंटीन गी खोलने दा मकसद आप सहायता समूहें दिएं महिलाएं गी रोजगार दे मौके उपलब्ध कराना ऐ। स्हाडे जिला संवाददाता अचिन दुबे कन्ने इस बारे गल्ल करदे होई सलोनी राय होरें आखेआ।

<><><><><><>

Dy CM Youths

उप-मुख्यमंत्री सुरिंद्र कुमार सिंह चौधरी होरें अज्ज आखेआ जे सरकार नौजवानें दे तकनीकी हुनर दे बाहे विकास लेई इक गतिशील वातावरण तैयार करने लेई केई पैहलकदमियां शुरू करने लेई बचनें बढ़ी दी ऐ तां जे नौजवान अपने आउंदन बक्श युनिट खडेरी सकन ते दुएं लेई बी रोजगार दे मौके पैदा करी सकन। उपमुख्यमंत्री विरासती दस्तकारी दी सिखलाई देने आहले माहिरें कन्ने गल्लकत्थ करा रदे हे जेडे उनेंगी मिलन आए दे हे। उनें आई.टी.आई आसेआ नौजवानें गी स्टार्ट अप खोलने ते नौजवानें गी रोजगार मुहैया करोआने आहलिएं स्कीमें बारै

जानकारी देने दे सरबंध्यै च बी गल्ल कीती। उपमुख्यमंत्री होरें डेपूटेशनं गी भरोसा दोआया जे उंदे आस्सेआ पुट्टे गेदे हर मसले दा समेबद्ध तरीके नै नपटारा कीता जागा।

<><><><><><>

Dy CM-Condolence

गगनगीर जम्मू-कश्मीर च होए दे दुखदायी आतंकी हमले दी उपमुख्यमंत्री होरें संख्त निंदेआ कीती ते नुकसान पर डूंगा दुख बुज्जेया। उपमुख्यमंत्री होरें मुश्कल दी इस घड़ी च प्रभावितें दे परोआर आहलें गी अपना पूरा समर्थन दिंदे होई आखेआ जे सरकार हुंदी हर मुमकन सहायता करोग। उनें दस्सेआ जे मुख्यमंत्री ओमर अब्दुल्ला होरें आतंकी हमले च मरोने आहले अबरोल दे अखीरी संस्कार लेई ते उंदे परोआर कन्नै खड़ोने लेई उनेंगी चेचे तौरा पर जम्मू भेजेआ ऐ। उनें आखेआ जे आतंकी हमले च अपनी जान मुहाने आहले अबरोल दे परोआर आहलें कन्नै बी ओहू मिले न ते उनें अबरोल दी घरै आहली लेई नौकरी दी पेशकश बी कीती ऐ तां जे ओहू अपने परोआर दी पालमा करी सकन।

<><><><><><>

PM-Russia

प्रधानमंत्री नरेंद्र मोदी होरें रूस दे राष्ट्रपति ब्लादीमीर पुतिन हुंदे कन्नै दक्ख्या मीटिंग लाई। 16में ब्रिक्स सम्मेलन दे बाहरें कजान च दपेहरीं मगरा एहू मीटिंग लाई गेई। मीटिंग दौरान प्रधानमंत्री नरेंद्र मोदी होरें फही जोर देइयै आखेआ जे रूस-यूक्रेन गी शांतिपूर्ण ढंगै नै अपने तनाजे दा हल तुप्पना चाहिदा। उनें आखेआ जे नमीं दिल्ली, मानवीय हीलें दी मदाद कन्नै, उत्थें अमन-शांति ते स्थिरता दा समर्थन करदी ऐ। उनें आखेआ जे इस दिशा च भारत हर चाल्ली दी मदाद देने लेई तैयार ऐ। राष्ट्रपति पुतिन हुंदे कन्नै मुलाकात दौरान प्रधानमंत्री होरें आखेआ जे उंदे रूस दे हालिया दौरै कन्नै दौनें मुलखें दा नेडमां तालमेल ते पक्की दोस्ती बांदै होंदी ऐ। उनें आखेआ जे ब्रिक्स शिखर सम्मेलन लेई ओहू कजान जनेहू खूबसूरत शहरै च आइयै बड़े खुश न। उनें आखेआ जे भारत दे इस

शेहरै कन्नै ऐतिहासिक सरबन्ध न ते कजान च भारती दूतावास खुल्लने कन्नै दौनें मुल्लखें मझाटै सरबन्ध होर मजबूत होउन।

<><><><><><>

Jitender-Samuhik Charcha

केंद्री मंत्री डॉ. जीतेंद्र सिंह होरें आखेआ जे मिशन कर्मयोगी कारण प्रशासन च नमीं संस्कृति दा विकास होआ'रदा ऐ जेहड़ी जिम्मेवार ऐ, गतिशील ऐ ते मौजूदा भारत कन्नै जुड़ी दी ऐ। उनें आखेआ जे मिशन कर्मयोगी नौकरशाहें गी सरकार दे बक्ख-बक्ख कम्में गी तोढ़ चाढ़ने च मदाद करोग। डॉक्टर सिंह कल नमीं दिल्ली च कार्मिक ते लोक शकैत विभाग दे मंत्रालय दे अफसरें गी सामूहिक चर्चा तैहत संबोधित करा'रदे हे। सामूहिक चर्चा दा मकसद मिशन कर्मयोगी, राष्ट्रीय शिक्षा सप्ताह ते कर्मयोगी मॉडल बारै जानकारी हासल करोआना हा। डॉक्टर सिंह होरें इस मौके बोलदे होई आखेआ जे मिशन कर्मयोगी तैहत अधिकारिएं गी नियमें-कनूनें शा बद्द अपनी भूमिका ते जिम्मेवारिएं बल ध्यान देना होग। डॉ. सिंह होरें मिशन कर्मयोगी पर प्रधानमंत्री हुंदी दूरदर्शिता दी सराहना कीती।

<><><><><><>